

BNM sedia guna instrumen, pastikan pasaran kewangan Malaysia kekal teratur

Astro Awani

15 April 2024

Harits Asyraf Hasnan

KUALA LUMPUR: Bank Negara Malaysia (BNM) bersedia menggunakan instrumen yang ada bagi memastikan pasaran kewangan Malaysia kekal teratur dan terus berfungsi secara cekap.

Menerusi satu kenyataan hari ini, bank pusat itu berkata, operasi pasaran BNM akan memastikan mudah tunai yang memadai serta pasaran pertukaran asing berfungsi secara teratur.

Ia susulan kenyataan Perdana Menteri Datuk Seri Anwar Ibrahim semalam bahawa kerajaan sedang memantau rapat perkembangan di Asia Barat termasuk kedudukan pasaran kewangan, serta potensi impak ke atas Malaysia, sekali gus akan bertindak dengan bijaksana bagi memperkukuh kestabilan ekonomi dan kewangan negara.

"Hal ini disokong oleh inisiatif berterusan yang sedang dilaksanakan bersama GLC, GLIC, syarikat korporat dan pengeksport untuk terus membawa masuk aliran dan mudah tunai ke dalam pasaran pertukaran asing.

"BNM terus memantau keadaan pasaran kewangan dengan teliti dan akan menguruskan sebarang risiko yang berpunca daripada volatiliti pasaran kewangan.

"BNM telah mengadakan sesi libat urus dengan peserta pasaran kewangan, termasuk ketua operasi perbendaharaan, yang bersetuju bahawa sebarang ketidakpastian akan berkurang dan menjadi stabil apabila keadaan ketegangan geopolitik semakin reda," menurut kenyataan BNM.

Kenyataan Anwar dikeluarkan selepas beliau hadir satu mesyuarat khas petang semalam yang berlangsung di kediamannya, antara lain bagi membincangkan situasi terkini di rantau Asia Barat.

Mesyuarat khas itu dihadiri Timbalan Perdana Menteri Datuk Seri Dr Ahmad Zahid Hamidi, Menteri Pertanian dan Keterjaminan Makanan Datuk Seri Mohamad Sabu serta pegawai tertinggi kerajaan.

Mengulas lanjut, Anwar berkata, serangan dilancarkan Iran adalah tindak balas yang berpunca dari serangan biadab Zionis Israel ke atas kedutaan Iran di Damsyik, Syria baru-baru ini.

© 2024 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-bisnes/bnm-sedia-guna-instrumen-pastikan-pasaran-kewangan-malaysia-kekal-teratur-466380>